

四庫全書

集部

欽定四庫全書

升菴集卷十六

明 楊慎 撰

五言古詩

答程以道

驅馬國西門，整駕城南端。
出宿指賓館，飲餞臨河干。
中道逢嘉友，誰云行路難。
四海皆兄弟，況是平生歡。
贈我錦繡段，佩之當袷鞞。
上縷膠與漆，下繪芝與蘭。
芳不歇，膠漆情無殫。
願為雙飛鳧，隨君千里翰。

玉溪云可與十九首

誦並

西使將旋卧病移旬

江漢起秋色池塘生夕陰蕭條衆芳斂啁哳候蟲吟清
光徘徊映圓影散空林采芝歌不發鍊藥行相尋隱囊
廢丹帙對晃虛清琴懷哉北望矚愴矣西飛心端憂與
雲結商聲隨風駸晏然山中暮弱懷良難任

行旅

行旅苦日短勞人知路遙忽忽歲云暮客心中搖搖曠

野饒寒氣四望但寂寥嚴霜下豐草朔風鳴枯條浮雲
起為蓋堅冰結為橋玉溪云下句甚奇
又有上句絕稱白日隱餘照玄
陰掩層霄鳴轂無停輪嘶馬不解鑣飛鳥夕知還征途
何迢迢無以慰苦辛興言自成謠

過河內作

晨行河內道曠然清客心太行北麓近丹流東逝深叢
芳金碧岸揔翠瑛瑤林蒲梢遮餘馥柿葉垂繁陰在藻
歸樂泳遷喬聞好音客行雖云苦對此一開襟既懷擊

壤詠復動滄浪吟古風美樂土茲情驗於今

感秋

江漢流無極浮雲去靡依類此遠遊子乘障戍邊圻故鄉三千里山川隔音徽日夕桀括栖涼秋熠燿飛離索星霜改端憂節序違處者怨不詹行人嘆式微焉得排雲翼遙隨征鴻歸

留別峨石李子雜用選句

美人仙李姿相期拾瑤草詎意旋嵐風吹我千里道輕

舟已迅邁歸信方浩渺所是同心者不得殊懷抱隔江
猶恨遙何況滇雲杪路遠夢魂迷思君令人老願托上
林鴻好音及春早

晨發高嶢東丘月渚楊墨池

荒鷄嗥西隣海霞射東壁又攜孤劍征去作點蒼客高
嶢亦吾廬安寧亦予宅屏居三十年宛如故鄉陌飛屐
頻登臨披衣數晨夕別離今幾時重到感疇昔兒童已
長成賓從盡衰白聯榻情綢繆晤語慰衰瘠此行擬何

為筋力疲疆場少城雲思紛江陽春夢積一身四處家
浮生百齡迫請為勞者歌歌罷轉愁劇

西征夜

寒重旅衾單嘿對燈花謝亂山荒壘間獨客孤眠夜寂
寞與誰同尋思似夢中勞勞無止極去去忘西東故鄉
孟冬別有約仲冬返人願天不從長征日以遠異縣多
相知樽酒話心期含悲不能語淚為生別滋

五日汎湖

鷄鳴海色動日出林霏開紅霞晃金碧赤帝騎龍來新
晴宜理棹佯佛遊仙臺榜歌聲流喝絲管清且諧且須
醉一斗以緩腸九迴

南竄始發京

秋風蕭蕭發驅車出郭東問我今何適竄身向南中南
中萬餘里去誰與同親交滿京國咫尺難相通且喜
脫幽縶未暇悲道窮矯目盼浮雲但羨高飛鴻

江陵別內

同泛洞庭波獨上西陵渡孤棹泝寒流天涯歲將暮此
際話離情羈心忽自驚佳期在何許別恨轉難平蕭條
滇海曲相思隔寒燠蕙風悲搖心茵露愁沾足山高瘴
癘多鴻雁少經過故園千萬里夜夜夢烟蘿

離思行二首

飛蓬無根株飄飄隨風起遊子辭家鄉流落在萬里當
歌有苦調對酒無欣喜閉門愁緒集出門多荆杞徬徨
安所之斷腸分流水水流何潺湲遠遊幾時還

其二

南望晴蛉道西眺渠濫川
石子何磊磊水流何煎煎
山川隔宇縣仰視空雲烟
鴻飛遠不到書迹何由傳
愁來坐自嘆氣結不能言
願假黃鵠羽輕舉隨風旋

采蘭引

趙弘道憲副因余之
此詩改闕名為蘭谷

廣通縣東響水關產蘭綠葉紫莖春華秋馥益
楚騷所稱紉佩之蘭也人家盆植如蒲萱者益
蘭之別種曰蓀與芷耳時川姜子見而采之以

贈子知九畹之受誣千載矣一旦而雪作采蘭

引

秋風衆草歇叢蘭揚其香綠葉與紫莖猗猗山之陽結
根不當戶無人自芬芳密林交翳翳鳴泉何湯湯欲采
往無路跼步愁褰裳美人馳目成要予以昏黃山谷巖
復晚脩佩為誰長采芳者何人蓀芷共升堂徒令楚老
惜坐使宣尼傷感此興中懷絃琴不成章

送陳德潤還茂州二首

鐘鼓寧樂鷄犬繡詎飾豨近隨扶搖翔何似搶榆飛勞
者恒思息遊者恒思歸達生貴止足君子當知幾宦途
類嬰網稅駕真解徽陽阿可晞髮高岡堪振衣疊疊時
過中戚戚何處歆相期保耄齒逍遙敬良暉

又

井絡當坤維岷山出其腹神禹生茲鄉石紐何蔥鬱採
藥遺古亭讀書留往谷靈峯隱秘文名山藏仙錄薤尾
翔飄鸞穗書昂立鵠瑞協宛委圖輝映岫嶠曲早慕子

欽定四庫全書

升菴集
卷十六

長遊晚滯周南躅煩君窈窕尋寄余琳琅錄

雙節篇為叅戎郭雲屏二母

周南標李蘭衛風咏栢舟淑聞播三族苦節傳千秋郭
門有雙節今古與同儔千金護襁褓九原安松楸保抱
自黃口相依到白頭仍雲繼閔閔將星紹箕裘天道豈
無知世澤楚水流叢桂既森森慈竹還脩脩令伯陳情
表惓惓思報劉聖代倚長城豈容歸林丘不日絲與綸
封章下冕旒我歌雙節篇石室他年收

寄余懋昭

名勛

夙昔夢見君攬衣顛倒裳繫君驂騮馬要我野遊翔
貽我金僊文合誦聲琅琅方舟青衣水共釣鯉與魴
晤言交款款攜手何洋洋覺來一何見纍然在南荒
荒鷄嗥東隣明月懸西方褰帷成起坐長嘯達晨光
因之萬里風慰言企來章

擬行行重行行

遙遙涉長途悠悠愁我心我心愁未央睽離日以深山

高水無梁寄書多浮沈魚樂在故淵鹿鳴思長林覺時
影與身夢來禍與衾端居遲日月旦暮如古今孤願人
詎知沉憂自難任君子不遐棄懷我以好音

擬青青河畔草

河水清且漣河上多芳草春風二月時千里交河道交
河漢家營荒莽少人行日暮淒風起黃沙與雲平雲間
有孤鴈附書自鄉縣翩翩欲下來聞弦却驚散草青鴈
北飛草枯鴈南歸鴈飛有歸時征人無還期

庭中有奇樹

奇樹生南國孤根來遠方佳名誰不愛植近君子堂春
風一披拂花葉何煒煌上有寄生枝亦得沾恩光桂枝
陵寒山梧桐在高岡草木非自獻信美非所將

續百一詩 十五首

齊庭陳大呂荆國起巫音雪宮繁鐘鼓朝雲進荒淫韶
輕既已遠鳳鳥不復吟中和變正則哀怨蕩人心師曠
奏清角晉壤飛祆祲曲工知炯戒燦言成良箴樂象析

理亂誰言古猶今

其二

飲飛佩寶劍涉江遇陽侯風濤起連山雙蛟夾行舟
人甘朽骨壯士故不憂解衣謝行侶拔劍探靈湫刺蛟
同剗蚘怒浪成安流名垂千載譽位取三珪酬嗤彼越
王孫榜歌戲中流

其三

豫讓感知已之死無二心青并敦友義捐軀酬斷金煌

煌彼二節照曜古與今國士有餘譽參乘無知音何當
續良史鴻筆興幽沉

其四

無恤營裏國詭遇樹崇勲寶符吞中山銅斗揮代君都
邑曜錯繡戈鋌耿長雲天道如環運人事猶玦分平原
生茂草邯鄲起烟氛一為房陵謳淒惻誰能聞

其五

許由輕九州歸休娛潁顏共伯棄千乘結隱巢首山漁

釣性自適軒冕憂相關澤雉苦樊籠神龍樂潺湲何事
子牟心猶存魏闕間

其六

大禹入裸邦纍然解衣行墨子見荆王錦衣吹玉笙豈
不易性素所重在全生栖栖非余志皦皦非余情所愧
先機者飄然反柴荆被褐懷珠玉何人知姓名

其七

墨子迴車地朝歌佳麗叢新臺既清洒淇水復春融鏘

如南子佩錦車同衛公隋珠光照日羅衣香從風招搖
過柳市繁華驚變童垝垣望復闕桑中接上宮咄哉贊
好德後乘有蹲龍

其八

周鼎鑄饕餮有首不見身食人未下咽災害旋相因禍
福互倚伏龍蛇有屈伸何事悠悠子狂妄若昧塵感彼
塞翁言宜用書君紳

其九

鄭國有良賈弦高與奚施西市秦離國東遇虎狼師烏
捷納犒質白璧通款辭乙丙已奪氣殺函成積尸小邦
得干城強敵亦何為

其十

楚女競吳桑兩國遂交兵膏血潤百里寶玉棄連城蟻
穴潰金堤燭火燦山楹毫釐一為跌尋丈忽已傾由蘖
在疆場扞禦非干旌安得起宋就永息瓜亭爭

其十一

尺木既有節寸玉亦有瑕清螭游濁水玄澤闕金沙小
夫工指摘巧言多喧嘩丘蚓蝮蟄龍折楊笑皇華不遇
明哲人終然成嘆嗟

其十二

隙陰審時運瓶冰知天寒行人在萬里道路多險難放
轍愁羊腸方舟畏狂瀾渺渺音問濶迢迢歲月殫采綠
動朝思葛生勞夕嘆願言托宵夢馳景隨飛翰

其十三

齊后厭佛士甘與鮒鮒居狐咷行哭諫陳斧斲東問囹
圜繫鸞鳳珩璜帶猿狙燕兵一旦至國象成剝廬達生
走奔綏觸子馳亡車遂令與鳩樂鞠為草莽墟麋鹿遊
蘇臺不獨傷子胥

其十四

東方本彥士和光在塵喧竊桃朱鳥窗避世金馬門狎
俗猶鷗鳥齊物若鷓鴣虛稱羽人流空擬歲星魂柱下
自異曲滑稽豈同源惟應夏泰初千載契知言

其十五

葛藟縈樛木兔絲附女蘿
夭夭二小草洪蔭仰巨柯
艷邑美任姒湘渚詠英娥
彤管久塵翳妬津生洛河
青史傷人疑黃雲驚女訛

緯書黃雲翔
女訛驚邦

驕牛信可乘良法在

金科

古律妬婦乘
牛狗部中

東望樓

南中謫居五詠

男子志四方焉能守一丘
壯遊輕萬里逸跡凌九州
撫時厭迫隘胡為此淹留
越鄉悲南冠騁望登東樓
遙樹

金匱山房詩集 卷十六
小如薺連峯如波流穹谷無足音遠水無歸舟眺聽何
所見馳目空悠悠海曲歌五噫天末詠四愁崇山自興
惻曠野誰與儔焉得雲螭駕托乘從霄浮

碧對軒

仲尼從鳳嬉子雲慕鴻飛興托寥天廓跡與名山依伊
予事執鞭夙齡脫帛鞮考室臨蒼莽開軒面翠微碧雞
栖靈景彩暈曜烟霏英岳聳升望晴巒引高晞會心生
遠意娛人留清暉玉露綴丹研璧月流金薇息偃忘坐

起晤言無是非柱下有遺言所貴知我希

學拱圃

夙尚丘園心憬彼逍遙樂幸從黑衣行得謝朱絲縛鋤
榛理荒疇雜茸擗長薄抱甕代桔槔樹枳當籬落春秋
時韭菘陰陽分藁藿寒瓜織女薦雲實仙人削紫莧春
雨零綠葵晨露泊下箸有常期加餐無爽諾厭酌賓筵
醴寧羨屠門嚼聊為野人謀毋貽君子嘍


辯義井

息壤海脉通幽壑泉華注浚發百尺靈沛澤千人聚光
爛九霞蒸美吸三危露朝綆環村氓夕杓喧隣孺碧甃
自歲甦銀床謝雕鑄南中饒炎燠北陸無凝洄漱盥水
齒寒存想玄髮駐蒙莊笑罔蛙羲象占谷鮒甘芳本易
竭澄深良難遇且從投轄飲休傷輻甍賦

悠然亭

蕭蕭者東籬莪莪者南山山色無遠近如在咫尺間茅
亭敞瀟洒葦門恒反闕朝見歸雲駛暮見飛鳥還飛鳥

不可即歸雲不可攀
悵我窮荒謫再見籬
菊斑列樹何
丰茸流泉亦潺湲
永日無氛翳地隙景
自閒時枉幽人
侶暫解遊子顏
清風已千載餘波及
頽頑



升菴集卷十六

欽定四庫全書

集部

升菴集卷二十七至二十

詳校官編修臣錢 樾

中書臣劉源溥覆勘

總校官原任中允臣王燕緒

校對官學正臣李 巖

謄錄監生臣蔣繼勳

欽定四庫全書

升菴集卷十七

明 楊慎 撰

五言古詩

擬古

上山采交藤下山逢老翁髮白顏轉少疑是古韓終此
翁何所居乃在深山中左右猿狖穴前後虎豹鼓風雲
徑路絕人跡那能通問年不肯答長嘯氣何雄翩然輕
舉去策杖如飛鴻

大中丞百川張公招飲靜居寺十四韻

韶序屆仲春遲晷正駘蕩好音流
睨時服改織纒英
衮枉嘉招夙駕東闈仗祇園敞靜居
香燈護龍象名言
析秋毫陸海披珍藏稔歲華黍豐樂
郊天絲颺曲水跡
非陳斜川圖可仰披霧吟泐寥謀野
乘閒曠晏粲倚文
翁式過懷葛亮下走奉陳人汎愛容
衰恙芝製厠端梳
塵容醉清釀信宿枉仙翰何以酬
台貺杲旭燭覆盆靈
籟鳴塞巷永言詎能殫鏤膺矢無忘

言將北上述志一首答蘇從仁思王子衡廷相

我辭承明直矯志青雲端銷聲絕車馬卧病對林巒甘
此臯壤怡謝彼颺靄干晨夕詠鑿井春秋歌伐檀奔曦
豈不疾國火三改鑽遊子戀所生不獲常懷安微尚何
足云弱質良獨難衡門坐成遠塵冠行復彈已負濩落
性更從樗散官進阻巖廊議退抱江湖歎曠哉宇宙內
吾道何盤桓

送黃才伯佐冊封藩府南渭

泛泛東行舟迢迢南渭流
淪波環楚壤派別引丹丘
竹嶼臨湘烟楓門映離日
金節斗邊來青翰天上出
分珪剪桐底鳴珂衣錦鄉
江干旋露蓋海曲卸雲裝
西岸蹇芙蓉東周折楊柳
燕喜拜華堂鸞謳獻春酒
握蘭五夜直采蕭三秋期
改予飢渴想遲爾瓊樹枝

登大慧寺迢然臺是日杜鵑鳴於北都

驅馬出城闕置酒臨高臺
高臺見百里坐望西山隈
雲氣何飄飄仍佛接蒿萊
前有芳樹林清陰鬱徘徊
飛鳥

遺之音宛轉悽以哀杜鵑非北羽誰遣從南來常恐商
飈發使我脩蘭摧長歌行路難感激傷中懷

和余懋忠青衣別後追寄之作

抽簪畫江沙寫出腸斷詞遥寄百里人見君昨夜思昨
夜復今朝百里又千里歡遊坐成隔乖離從此始乖離
渺何許異國猶鄉土雲從青衣來月自峨眉吐雲月兩
悠悠光景為君留因之托宵夢遠到海西頭

瓊音篇寄康對山

晨逢南州牧攜手滇之陰言從太白來貽我瓊黃音題
封五雲爛開緘雙鳳吟伊人先鳴者夙齡晏清襟良史
古班馬逸民今尚禽商泛憫宋玉芻委嗟師金泝東青
霞想澣西紫芳心戎旅未云返嵇駕何由尋因聲萬里
風調短情方深

尚子平禽子夏二人後漢逸民
唐詩安得山中信致書移尚禽

贈張愈光詩 三首

孔雀生南涪裴田紫蔚林文采既彪炳與世亦殊音時
哉固多騎猿羅忽見尋羽毛琴以儷阿閣迥且深一彈

哀鸞唱再撫孤鷓吟荒塗不可踐為君愁我心

又

迢迢禹氏山珠璧交晶英二六照梁乘三五連趙城兩
美必相合誰言容易并則足傷卞盃按劍嗟枚生子續
艱征賦余和從軍行同心復同患日暮天末情

又

大雅淪千載正聲代以微鷹隼乏翰采雉翬無高飛有
鳥來西極羽羣實所稀風穴吸沆瀣天池濯毛衣翹翹

千仞翔郁郁九苞輝君才文苑鳳隼雉焉能希梧枯醴
泉渴日暮恒苦饑何時逢天老駕言玄扈歸

送終安人王氏塋恩波阡

石流何湔湔滄漻增其波天陰日易晚曠野悲風多嚴
霜下喬木零雨泣柔柯蕭條我行野傷心悲如何中道
失嘉耦送此山之阿凜凜歲方晏誰與同歡歌君看彼
烏雀各自安其窠

效古

朝遊魏峩宮暮墜嵒嶧壑面笑背成歎春華秋已落耳
餘互侵陵田竇相傾奪富貴生不仁榮華有銷鑠何如
商山翁茹芝詠莫莫冥鴻度逵陵樊籠豈栖託

雙魚鋪

峒峒山上亭上有雙魚字回顧望新城欲將雙魚寄泛
泛東水流蘋藻相蒙翳釣竿何嫋嫋魚尾何曾麗緘意
付歸風日暮江之汜

送崇慶白判官

宦績標南郡賢勞賦北山分携千里外留滯一年間梅
閣春全隔花宮月幾彎水聲隨露冕塵路損風顏別路
遥岑合離亭二水環永言君子贈懷惠野人攀共道鶯
遷近來瞻馬首還

送曾東石

文鳥生岷山來翔十二樓覽德簫韶下長鳴向南州翩
翩慕儔者睠言不可留河梁一相送飄風吹方舟山川
隔光彩嘉會期三秋清商易終曲何以慰離愁常恐麗

澤遠索居多，愆尤馳心如日月光彩隨南流。脫有歸飛翼，因之問阻脩。

秋日雜詩二首

秋霖溢城闕，后土何時乾。周行無軌轍，出入阻且艱。長安有一士，華門晝長關。開徑理蓬蒿，荒我蕙與蘭。蕙蘭日將歇，蓬蒿不可刪。仰首向浮雲，慨然增永嘆。

又

羲和運天晷，候蟲和歲陰。昔為莎鷄羽，今為蟋蟀吟。感

卷十七
彼蕭條節動此棲遲心旅人在異鄉相思夢同衾登臨
一以眺但見丘與岑清冷含廣澤悲商印遙林結軫還
歸來當軒撫鳴琴幽蘭久不奏誰哉知此音

贈錢少容僉事

之子體英彥弱齡稱國華先名出藝苑發跡翼名家澄
清攬飛轡亨衢有高車儀鳳自覽德神羊本觸邪當今
爽鳩墟千載同其嘉翺翔屬宇縣音塵非天涯離居欲
有贈持此代疏麻勿言吏道迫坐令爾音遐

送徐用先歸嘉州

客有歸歎嘆言從隱者流高議在青瑣吾道付滄洲
滄洲多故人夙昔諧幽賞嘯歌丹崖邊携手紫霞上壁津
春水生波浪動江城岷嶺秋芳落清音滿蘭若亦知江
湖憂不廢登臨樂迢迢結桂枝望望阻相思殷勤三歲
字惆悵四愁詩伊予慕儔侶睽離分晤語何時峨眉雲
來作人間雨

送王舜典知成都

新解郎官綬遥分太守符巖程趨左蜀歸榜過東吳玉
壘關雲淨青城嶺月孤乾坤回治象江海接亨衢露冕
仁風播隨車解澤濡漉流通暘壤生色到寒蕪筐篚窮
方貢兜鍪整國須幾年懷樂職今日會昭蘇蕙范歌當
繼王褒頌不諛循良千古事肯負兩輪朱

和方思道毛塢之什

毛塢之什棠陵方子所作也一曰出棘竹二
曰解藤杉三曰竈觚桐四曰楹中鯉升菴子

讀而愛之倚而和之改為冉冉孤生竹裊裊
杉上藤悒悒竈觚桐育育楹中鯉如其章如
其句如其意如其聲

冉冉孤生竹遲此方苞月玉節本璘珣孚尹亦旁達叢
棘紛糾纏興言誰剪伐詩人執斧柯君子在林樾朝看
清陰成暮聽商飈發一歌猗蘭榮再占泰茅拔不有栽
培心曲直竟何掘

裊裊杉上藤翳此荒水濱蛇蚓一以結虬龍何申申清

風扇中壤渥露溥高曼奇樹既有華散木亦有身歲寒
異凋謝發生何齊勻匏瓜徒自繫持此嘆迷津誰當貢
衡室上與階棠倫

惛惛竈觚桐采自樵人塢徽軫不得薦構櫨亦何補况
復近庖厨宮商委泥土哲匠秉清規知音慕中古正聲
歸雅琴俚耳羞箏鼓中郎不可見虎賁猶堪取何時期
幽尋淥水遊春渚

育育楹中鯉本是充庖魚戢鱗隱文章駢首相沫濡豫

且下清冷元君夢玄夫品物雖異流共戚亦通娛但取
莊生樂那知子產愚放之悠然逝相忘於江湖誰言爾
為爾自信吾忘吾

送嚴維中

北辭鳴鳳池南登歌鳳臺命儔嘯匹侶羽翼臨當乖舫
舡張且歛河水滌復洄靡靡君行邁悠悠子軫懷離日
汀洲下驚颺林葉頽分襟一為別懸旌搖以摧會合良
不易臨岐重徘徊圭璋多特達清角少喧虺贈言無他

勗聲儀望重來

送郭价甫三首

洋洋北流水搖搖南行舟
良友當遠邁祖帳臨汀洲
歡觴恒易滿別襟苦難留
形影邈千里德音誰與酬

又

德音無與酬悵然興我思
人生非鹿豕安得免乖離
河洲有芳蘭采之堪贈貽
猗猗揚馨香千里同襟期

又

襟期千里同川塗兩都通王道方砥平高衢騁駿雄東
賓問西主南燕避北鴻音塵豈寥廓端居有長風

送盧師邵

名雍

空谷滯楚步石山枉佳招長風自遠來逸翮懷迫霄期
我于浮城投我以英瑤我僕已整駕我馬亦在鑣愁霖
泥修途江廣詎通舫粵子睽昔約伊人阻今朝良會虛
高言三遊絕孤標神襟重悒悒悵望倚逍遙佳期曠何
許碧雲生沈寥願附同聲翼因寄相思謠

寄巖維中

美人在桂林貽我金琅玕高情與逸思遙下青雲端相
去萬餘里黃鵠飛猶難湘灘何悠悠衡麓峭層盤擊汰
浥清泚振衣凌巔岓奇觀洞前古嘉藻留英翰壯遊輕
路永遠別驚年單夢澤流漸解鈴峯零露溥遵途返星
駕會闕峩雲冠伊子嬰夙疾塊然慕朋歡愧彼桑蓬志
甘此藜藿安懷書重端綺佩言芬如蘭始願愛青華終
期同歲寒酬德遂有述展歌情未殫

欽定四庫全書

升菴集

七

升菴集卷十七

欽定四庫全書

升菴集卷十八

明 楊慎 撰

五言律詩

採藥

危磴捫蘿上，名山採藥遊。
木條刊落鴈，籬蓋剪牽牛。
簡子紅仍艷，長卿翠欲流。
三花聊永夕，一葉莫驚秋。

暑夕

工跳昭侯蚤，翾飛露女蚊。
青蒲眠不穩，白羽揮徒勤。
南

浦生涼月西郊聚密雲
星橋歸思逼力疾坐宵分

松韶關弔孫松山中丞

京兆推孫寶
郇瑕得智瑩
才教烽火靜
已見謗書盈
夢斷瓊瑰水
魂歸貫索城
故山聞笛處
松壑動悲聲

閏春廿日夢在金沙寺與劉珥江及三際禪侶
清話覺後因記之并寄珥江

錦水白蘋渚
金沙青豆房
名僧偕梵志
才子共劉郎
覺路花非染
靈山草亦香
碧雲牽別夢
忽寤在江陽

桐花 甲戌年作追錄於此

曲水惠風輕桐華正吐英枝條引晨露

世說清露晨門
流新桐初引

巷近清明剪剪寒應盡霏霏雪不驚啄花么鳳小又見
綠陰成

苦熱

溽暑蒸潤土火雲燒遠空閉戶類螺蚌解衣真保蟲枕
石無涼氣揮扇亦炎風引脰望西顛金伏何時終

贈高白坪方伯

稅駕辭徽省披林構草堂虛舟分雪浪泰宇發天光
片藻金籬外芝蘭玉砌傍丹丘何必問此是白雲鄉

江陽秋熱八月作

四序重開夏

俗言天下三伏瀘州六伏

三炎未解威心遲冰雪節體

想芰荷衣靈籟無清吹嵐光滅翠微閨風與玄圃羽翼

詎能飛

六月八日第四雛生用韻答二韓表弟

適甫述甫

茅舍亦懸弧欣看第四雛自憐牛舐犢誰謂蚌生珠娛

老堪提抱成人任魯愚多情二表弟良夜待傾壺

少宇宋公夕飲行臺

涼雨淨紛埃華筵向晚開疎星臨紫宙新月照烏臺麗
句高難和玄言聽未回詎訓傾蓋意無奈別旌催

詠繩橋追錄

度索尋撞國升猱飲狄形俯窺愁淨綠仰睇失空青雨
過苔絙濕風來箬霧腥天將限夷夏何用罪坤靈

元宵宿北岩開公房

春醉依蓮社宵談衍葛藤雲僧標指月天女步然燈桑
下經三宿蒲團了一乘何須分垢淨持此問南能

王母瑤池圖壽李右川母張太安人

乾州永壽人

仙鄉名永壽仙李即蟠桃彩服晨趨數瑤池夕晏高遐
齡還再閱恩詔見重褒笙鶴三天下雲中聽響璫

哭徐用先

子卿還絕漠賈誼返長沙共喜天才定俄驚日已斜
顏
峯縈九折逝水繞三巴掛劍應無地飛蓬慘淚結

西施詠

張禹山云絕似太白

美人出南國名字號西施鸞舞隔烟霧魚驚沉網絲輕
盈羞燕尾窈窕妬蛾眉一入吳宮去姑蘇麋鹿時

戊戌除夕贈縈經徐尹

今夕知何夕明朝是歲朝雪封嵐氣淨雲護嶺天遙楊
柳驚橫吹梅花起麗譙故人新酒熟儲興款春宵

辛丑新正

貴竹逢新歲寂寥空館時泉聲為滴漏原燒作晨曦野

戍擊柝早山衙開印遲春盤羅鬼菜凍體欲流澌

來報豚兒生志喜一首

魚札報堂琅犀兵走阿幢孤懸金雀幔花燦玉蟲缸老
蚌寧嘲晚明珠訝許雙歸來梨棗熟笑傲倚陶窻

寄中麓李伯華

中麓何山隱青丘太岳東藏書伴宛委問道即崆峒鸞
鶴烟雲駕烏蟾日月籠相求天路迴惟許谷神通

秋風引

霜凜銜蘆急秋深懸炭輕感葉吹籬響熠燿係塔明盧
女流黃色班姬擣素聲誰教明月引翻作苦寒行

星回之夕夢一美丈夫自稱宋玉謂余曰公獨
無詩贈我乎夢中作一首四句覺後續之

文藻三閭並幽懷九辯知雲為巫峽賦雪作郢中詞茅
屋還遺址蘭臺異昔時鴻裁誰獵艷空自拾江蘼

夏雨

微涼生細雨半夜似新秋玉軫琴絲緩金爐香氣浮簷

花濺碎滴地鏡俯清流東閣多閑暇西池好倡酬

夜次寧郭

風急毳裘輕關河向晚程星從鴉背出月傍馬頭生雪
店懸燈影寒譙送角聲鄉園知日遠夜夜夢瑤京

下連山

一辭青鎖直長望碧山阿鄉樹雲中出京塵馬上多釣
航依水竹精舍入烟蘿春色催歸興風光待嘯歌

春夜望月

今夜南樓月中天北望餘星河分宇縣鐘漏隔京華露
砌光含竹春江影泛花留連竭樽蟻潦倒待城鴉

梓潼道中

小市孤烟起平岡落日斜素林驚夕鳥錦石戴寒花悵
別關河晚憑高眺望賒上亭今夜月流影夢還家

早發解州

旅宿先鴉起歸心與鴈爭冰霜殘臘路花柳上春城隱
士嘲西笑騷人感北征勞生應物理奔走愧虛名

夕泊江陵

西陵白雪晴南浦綠波生
海燕先春至沙禽恒夜驚
竹房燈下市花舫月中筇
且醉桑郎酒休傷萍客情

乙酉元日新添館中喜晴

白日臨元歲玄雲放曉晴
城窺冰壑迫樓射雪峯
明客鯉何時到賓鴻昨夜驚
離心似芳草處處逐春生

西使後期東尹舜弼

綠蟻離觴困青驪
首路淹江臯遲白日嶽麓近
朱炎別

夢春猶隔勞歌夜未厭刀頭詎可問飛鏡轉織織

琉璃河

碧水琉璃淨朱橋牛斗新風花回曲岼春樹隱平津清
夢繞江汜佳遊限洛濱肯停飛蓋影未洗化衣塵

孟津二首

檣櫓橫移岸樓臺背枕河飛甍臨積水懸雷下洪波蛟
避荆飛刺龍驚女激歌自憐非估客風浪飽經過

又

河曲風烟古天涯旅望深津樓環日淑碣石帶雲岑竹
箭春添溜蒲帆暝逗陰岷源千萬里何處是江潯

青橋

閣道盤雲棧郵亭枕水涯猿猱臨客路雞犬隔仙家風
起青丘樹春迷玉洞花

玉溪云
真唐句旅懷今日豁停憶問袞

斜

錦城夕

錦波澄霽色丹樓生晚輝江光二流暝橋影七星稀猶

明叔度火未息文君機南陌驂駢度東城鐘漏微

玉漢云初

唐氣格

九日遂寧縣郭西登高

烟霞萬里開鴻鴈幾行來

玉漢云登高自見

江近飛烏國山高

戲馬臺霜華沾旅服霞影落仙杯坐惜佳辰晚斜春未

擬回

玉漢云蜀有此景

遊靈泉寺此地有席司諫讀書處感懷興悼一

首

司諫幽栖地空門歲月深
泉臺埋玉樹靈境闕仙音
逝水興三歎遊山廢九吟
風微何寂寞松栢自蕭森

咸陽

帝里繁華歇神臯歲月多

玉溪云二句用事精到

秦城依北斗渭

水象天河顏堞無遺土
驚川有逝波丘陵沉霸氣
松栢

起悲歌

玉溪云千古感激

硤石道

石壕環陝驛澗水帶嶠關
東望封泥谷南連積甲山
秦

輪無隻返趙壁有雙還陳迹虛無裏荒臺蔓艸間

出山
州事

似王
揚

層臺驛

陡坡千百磴破店兩三家濕竈薪無焰磽田飯有沙瘦
兵宵泣血猛虎晝磨牙行路難如此羈愁一倍加

箐口關

箐口關何險山頭路更賒凌兢磨旋蟻屈曲陣蟠蛇官
舍惟孤舍人家無一家客心何處切夕照閃歸鴉

觀刈稻紀諺二首

平章門外路散策喜涼天
雨漲青蛙水秋成白鶴田
林塘聞牧笛墟里起炊烟
欲問滄洲趣滄洲趣不傳

又

田父邀予說秋成此歲多草頭
占月暈米價問天河樂土寧無詠
豐年亦有歌惟愁軍餉急松茂正
干戈

雲隱林中

燕坐洗塵顏風林久未還
衆流爭漱浦群瀨欲聳山
鳴

蜚揚陰靜飛蠅檜影閒晚來空翠濕似覺雨斑斑

宿龍宇寺

二妙此招携雙林狎遁棲禪僧香霧窟樵子青雲梯寶
樹颺埃淨曇花色相迷有為應笑法詩句續燈題

送張惟信冊封唐邸因歸省母

鳴玉遙持節分珪重剪桐驂駟開蜀道蟋蟀采唐風稅
駕雲山外迴舡月峽東還將南陔什一奏北堂中

高峽臥疾喜簡西嚳至自滇城

隔戶聞來屐移燈坐對床
澄心披樂霧點鬢訝吳霜
便欲開棋局還思減藥囊
天涯故人少且願駐飛航

永寧諸賢送至魚鳧關

遠送魚鳧外離情奈若何
今晨岐路泣昨夜燭房歌
西上滇雲影東流蘭水波
生還如有日相伴老漁蓑

寒夕 七十行戍稿

東西垂老別前後苦寒行旅
鬢年年禿羈魂夜夜驚春
鉏甬內貯石闕口中生讀書
有今日曷不早躬耕

畢節簡蔡席二廣文

鶉衣裹凍身荒館夜難晨
冷榻誰相伴寒爐獨可親
途窮千慮失天遠四愁新
夢裏兒童戲醒來倍愴神

瓦店寧塗峻嶺

古木千章合飛靈六出齊
馬行冰上滑人向霧中迷
屐齒穿空石昆蹄陷弱泥
幾時辭梗泛垂釣隱桃溪

再會東晦癸卯歲

南來復北去暫會又離羣
投館日卓午緩程春正分
楊

園花勝雪雉堞粉如雲白首猶行役勞勞愧隱君

三會東晦

金醴醉連宵瓊枝別此朝折梅臨埃館結桂佇河橋燕
笑風前斷驪歌雲外飄青山有明月愁影轉蕭蕭

臘八日與墨池野酌遲丘月渚

散步謫仙橋嚴寒酒易消雲容將變朔風信已鳴條只
為朋從好渾忘旅寓遙清吟遲月渚剪燭永今宵

升菴集卷十八

欽定四庫全書

升菴集卷十九

明 楊慎 撰

五言律詩

正月二日觀社

滇海曾觀社重來歲月更江山
依舊麗耳目幸猶明
眩服兼村雅香醪雜濁清
杜陵詩句在久客惜人情

發安寧

悠悠戎旅情甲歲汨吾征
征馬諳舊路飛鴻載前旌
倭

遲此周道來往非夷庚東君憐衰朽假我以新晴

正月十一日宿祿豐寄丘月渚楊溪山張見梅

楊墨池

客星無定影驚鵲又遷枝避地仍多阻還家未有期東
橋花月夜南浦蕙風時攜手難同賞勞歌寄所思

與李葵之殷憲卿夜飲

旅寓逢新歲芳隣聚此宵梅花普賢寺楊柳謫仙橋又
醉雙文酒休歌獨酌謠并州故鄉地渾忘路迢迢

留別安寧滇城諸友 二首

垂老西來日天涯此會稀馬蹄聲特特鴈陣影飛飛南
海情偏厚東坡語未非海莊岑寂地車轍滿荆扉

又

垂老東還日天涯此別稀關山歸馬地江水釣魚磯秉
燭情何盡銜盃淚欲揮相思幸相問處處有鴻飛

廣心樓小酌憶張禺山

久客高峽上登樓眺望頻雲連董貢雨花接晉寧春蘇

李詩篇盛陳雷意氣真不逢劉會孟誰識兩仙人

劉義亭訪予高峽宿毛氏萃芳園夕歸

坐對仙巒暝歸防竹徑幽玄亭雖寂寞清話且淹留
晝足揮毫興宵添秉燭遊遊仙何必賦即此是丹丘

五月二日太華寺會效韓昌黎

雨後來更好山水有清音紫霞池上酌白雪丘中琴
悟以千佛偈因之九仙吟聞鐘發深省颺爾灑塵襟

宿積翠巖

曉色動香塵。天風雜梵聲。雞鳴關樹白。龍臥海波清。
浦行捐佩滄浪坐。濯纓思歸還。引望懷古若為情。

遊玉案山寶珠寺

名山已發興。空宇復離羣。開樓見西海。出岫指南雲。
泉華玉雷接。風籟紫霄聞。前朝一片石。金薤剥苔文。

酬金秀才

錫浙江武康人

伏枕抱疾日。閉關餘春時。欣聞空谷音。適與中林期。
清風灑蘭藻。零雨坐茅茨。翻然不可見。悠哉寄遐思。

烏撒喜晴

易見黃河清難逢烏撒晴陰霾既已豁險道况復平蜀
日杳千里滇雲惟十程江花與江草異國看春生

大理春市因憶李仁甫

海國櫻桃市春山蘭蕙遊青絲盤駉裏紅頰醉扶留狼
荒金莫辨鮫宮珠暗投佳人眇天末因之問阻脩

大華寺即事

舊雨高峽上新晴太華中松門燈山靄蘭渚鏡文虹鐘

動烟花紫燈然暝色蔥山僧多養馬疑是古支公

大相公嶺

九折刺史坂七擒丞相橋
沉黎漢原古巖道蜀關
遙策馬冰槽滑乘橈雪
濤消我行再經此感慨一長謔

招劉善克

戎旅九塞上暫歸如夢中
雙江碧雲合九橋明月同
搖心渺天末携手期城東
佇立永今夕銀蠟粲銅釭

送毛東鎮往臨安

金瓶梅詞話卷十九
卷十九
縹縹碧雞使蕭蕭班馬羣
離亭方禁酒征路正炎氛
水弩含沙影天鷲墜火雲
歸音期蟋蟀莫待海花紛

魚鳧闕燕別趙龍巖僉憲

有美臺中彥懷予別思長
薄雲隨馬首落日送漁梁
野燎山多黑江秋荻已黃
搖搖愁轉旆寧用訴華觴

北橋離席留別趙州諸子

漂泊猶戎旅羈栖且歲年
又傷南浦別重醉北橋邊
烟樹環江澣風花簇野筵
鄉心那可問愁思繞離絃

荅馮敬臣 二首

北闕承恩譴南荒作旅人
可堪同瘴癘猶自隔音塵
鶴嶺霏烟外螳川積水濱
三年不相見兩地各傷神

空宇澄新霽殊方報早秋
涼風天末樹明月海邊樓
塞草封歸望湘蘭喚別愁
來章三復罷對酒不能酬

荅楊從龍給事

仙居深紫府旅望渺蒼波
五夜勞魂夢三年阻嘯歌
雲心陶令遠秋興杜陵多
魚浦南風便龍關一羽過

感通寺

嶽麓蒼山半波濤黑水分傳燈留聖製演梵聽華云壁

古仙苔見泉香瑞艸聞花宮三十六一一遠人羣寺有僧無

極者洪武中首率僧衆歸附朝京御製十六
詩送之還詩云衆僧經通佛旨語善華云華

云華
言也

次張大理文柔別後見寄韻二首

四牡何時發雙魚此日將別離驚艸綠衰謝感芸黃澤

畔風霜勁天涯歲月忙款襟難借問濡跡但相望

垂老雲南戍逢君海上州
桂招非小隱萍泛是同流
江漢詢幽側關山慰阻修
欲酬平子贈空有畔牢愁

水邊梅影

玉宇暖微霄瑤華擢秀翹
貝宮浮藻景魚浪淨蘭撓
珮冷漢臯橘珠明河上蕭
不逢南雪唱空倚北風謠

夢遊感通寺簡諸友

李白題詩寺文簫寫韻樓
海光浮樹杪山翠滴牀頭
熱想寒泉濯春曾煖谷遊
瞑鐘蘿月下清夢一相求

謝楊肅菴都諫惠筆

彤管分青瑣瓊緘到紫巖艸玄疲執戟花夢老江淹
峴谷籜龍健寒宮桂兔尖無因白雪唱空擬碧雲瞻

亭前引水名曰墨池

金潭朝洗菊玉甃暖滋蘭何如玄趾水分作墨池瀾烟
雲生几席星斗宿闌干問字休携酒仙家沆漑寒

過石樁村訪唐河東刺史王仁求碑二首

唐代河東守周朝聖歷時土花封綠字石髮被金碑泣

露麟猶卧嘶風馬自悲荒原誰過問郡乘不曾知

鳴蟻古河東川原勢亦雄城荒弔華納山遠問蔥蒙玉
筋埋天祿銀鈎剝畫蟲閭丘名姓在鄉衮仰清風

玫瑰花

庭際玫瑰樹含芳當坐隅春盤紅瑪瑙曉帳紫珊瑚風
信翻霞錦天香綴露珠仙壺春醞好留著醉麻姑

玫瑰花入

酒尤佳

竹戶

竹戶少塵埃濃陰鬱不開靜聞清露墜涼送好風來烏
下彈瓊粉蟲行篆紫苔無人共欣賞坐嘯獨悠哉

海蕓

即葑田也浮於水中東西往來

芳洲隱蘋末葑埒寄蘆中上下隨春水東西逐夜風浮
家還泛宅斷梗復飄蓬感物傷羈思生涯愧海翁

出塞

地名六朝體也

烽火照甘泉刁斗出祁連錦車衝鳥穴翠眊度雞田高
柳分斜月長榆合遠天交河冰正結心斷玉門前

詠霜

天駟粲寒芒青腰騁素粧珠簾銀蒜白金井碧梧黃漢
署宵鐘徹胡庭曉角長豐貂無暖色坐待燭龍光

滇池泛舟見新鴈

忽見行行鴈來應自故鄉天涯多少路雲際幾番霜滇
水饒葭萸禹山足稻梁金河爾休戀無限虜弦張

中元夕望開福寺塔燈

窳堵高千尺然燈達五更剛風吹不滅甘露洗還明龍

燭真堪並蛾飛不敢驚
獲升何矯捷應見闈婆城

詠琵琶

迴窻映華表連環繫錦絛
桃葉雙鬟小楓香一調高牛
羊上青塚狐兔沒黃蒿
留賓芳夜促且欲醉蒲桃

春江曲

時女翫春翹新梅發遠條
風香隨步步雲彩艷朝朝
悵望迷晴浦音書候晚潮
玉輪江上水心斷木蘭橈

折楊柳

白雪新年盡東風昨夜驚芳菲隨處滿楊柳最多情染
作春衣色吹為玉笛聲如何千里別只贈一枝行

雨

蟬咽枝頭露鳩搏樹杪風窻窻涼意足葉葉雨聲雄案
對燈花喜宵分葦色融不知何水部吟斷滴堦中

青橋驛

鍊壁千秋雪冰崖萬壑雷人家比星散鳥道入雲回旅
寓山河隔鄉心日夜催客行春又夏不見捷書來

渡黑龍江時連雨水漲竟日乃濟

飛鷁朝暎霽停驂午漏分客心隨水急人語隔江聞
雨過添清氣風生愛殺紋中流歸棹穩歧望有來羣

憶用敘弟

阿弟遠行役一年無定居勞勞恒念爾寂寂正愁予
日月攀芳樹雲霄隔素書燕南池草綠應好賦歸歎

同祝鳴和錦江泛舟

名鑿

八月茅花水諸天桂子風追涼琪樹底擊汰錦亭東人

境囂塵隔仙曹逸興同城樓鐘欲動斜照帶微紅

遊中崑寺

高閣諸天近長江客路分帆開山吐月鐘動水連雲漁
唱通宵起樵音隔浦聞佛香渾不斷散作南崑薰

次胡孝思中崑韻

翠微連寶地青靄壓雲堤俯瞰行人小平瞻遠樹齊振
衣淹暮屐迴棹聽寒聲雨歇楓林靜荒雞尚未啼

候朝簡王舜卿

文華接武英鳳吹應雞鳴月晃牙牌字風傳玉珮聲天
香飄左掖宮漏隔西清不是班行迴焉知夙夜情

桔栢渡

在昭化縣東二里

桔栢古時渡江流今宛然名存巴國志詩有杜陵篇鵝
鷗衝烟散黿鼉抱日眠分留餘物色朗詠惜高賢

重過華清宮

綉嶺仙人閣華清玉女湯山川猶氣象臺殿久荒涼暖
水生烟霧寒松受雪霜碑文無歲月螭首臥牛羊

臨晉道中

茅店昏烟集榆鄉燎火開宵征何太急暝望忽相催月
樹羣鴉散霜橋列騎回解城聞漏點星宿滿梅臺

七夕憶遠

離人惜離景星聚又星分雙津烏鵲候三山鸞鶴羣錦
江澄夕浪玉臺生曉雲山途何渺渺愁思極紛紛

送王維賢吉士出知廣德州

朱方新出守玉署早知名邦域周千里文章漢二京鳳

皇天北顧鴻鴈暮南征清賞何由共瓊枝別後情

周彥通侍御秋齋二首

北斗臨茅宇西山出蕙樓涼風吹玉樹明月下金丘歌
對梧桐語辭因叢桂留高人耽吏隱不是采真遊
鳳皇巢扈閣蟋蟀在西堂廬是承明地園非避世墻清
琴宵弄月白簡晝飛霜采采籬邊菊相期重晚芳

齋房春夕

青雲臨鹿苑煥景入虹梁燕坐諸天近齋心五夜長塵

埃徐孺榻燈火贄公房
隱隱聞清漏迢迢出建章

酬郭司業

元歲天齋裏新陽月
令逢僧房聯下榻
仙珮待鳴鐘雲
會連枝比宵分
隱几慵同心成坐
隔回首是行蹤

送余懋忠

河上冰猶合關山鴈未回
君行阻舟楫征馬犯塵埃
天遠驚離袂春寒入勸盃
江東碧雲外日暮獨悠哉

春雪

南雪轉東風，千門四望同。
愛穿珠箔透，愁點玉階融。
竹覆玲瓏葉，梅殘綽約叢。
夕窻還映白，蠟炬更添紅。

春雨

春雨掩柴扉，勾芒力尚微。
潤通瓜蔓水，寒透木綿衣。
大澤龍蛇遠，空林鳥雀稀。
山翁多甲子，杖屨候芳菲。

惟信朱曉早發至古店回詩見寄次韻

井轄虛投夜，河橋暝發時。
明星將鳳駕，重露欲沾帷。
南浦蘼蕪合，東門楊柳垂。
回風飄錦字，空谷寄遐思。

清源樓觀漲 二首

潢潦飛欄外，洪波古堞前。
山收玄豹雨，江展白虹天。
牛馬迷昏谷，魚龍失故淵。
樵人歸太晚，陽浦認炊烟。
雲色含山色，濤聲撼樹聲。
枯槎何處下，怒浪幾時平。
退鷁昏相失，飛鳥晚對鳴。
如何誇海若，猶自詫莊生。

寒

天籟調寒吹，神鑪煉曉霜。
稍驚綿力薄，還訝葉聲長。
畫戟歸邊將，青綾直省郎。
誰論萍氏禁，須問麴生方。

梅天郊晚

連日黃梅雨，鼃聲積漸多。
豐年無赤地，平野似銀河。
園篠涼生葉，堤檉水沒柯。
半村斜照裡，收釣晒漁蓑。

寒食見梨花

寒食村藏寺，晴光水見沙。
老僧閒貝葉，邀客看梨花。
塵外水壺瑩，風前玉樹斜。
洗粧猶待雨，春態倚雲霞。

寒霄月色

明月流寒影，低欄復轉廊。
雪霜流澹白，參昴伴昏黃。
野

徑多樵笛江村有釣航不教烏鵲定直待燭龍光

寄許玉林

吾憐許玉林道氣夙齡深懸車未華髮解佩晏清襟山
水歸與興琴樽靜者心紫芳行可覲丹竈擬同尋

訓袁永之

書自陽朔寄來

袁名袁

書到滇陰日封題陽朔春同心雖異縣未面已通神駿
發高岑後鴻裁擘壽新

永之近著
皇明獻寶

伊予嗟暮羣顛子揆

天宸

寒夕

壁月寒生暈銀河凍欲冰
簷花穿霧松窻紙戰風稜
桂火噓難焰蘭膏坐自凝
新梅如姹女粧束待晨興

霧松木水

也著樹玲瓏如花諺云霜
松打霧松貧兒備飯甕

送朱參政良矩還金華

朱名方

仙人無白髮何事早歸山
東海文鯨逝南雲倦鳥還
竹林同晉逸芝嶺異商顏
明月和清夢隨君度雪關

秋夕高峽早起

獨向高峽宿遙聞水寺鐘疎燈青耿壁斜月翠沉峯星
點螢穿竹潮音鶴舞松明湖開曉鏡倒影木芙蓉

村曉

水寺霜鍾起山樓曉堞迷長庚配殘月斜漢界晴霓犬
吠聲如豹蠅喧聽似雞老懷渾不寐遙夕又新題

寄王雲巢

紅塵厭市塵白首伴雲眠巢父元無地壺公別有天北
山迴俗駕南嶽定詩禪莫訝焦鷄細逍遙且大年

懷韓子中

風流點蒼彥天骨乘黃奇出宰千家邑歸無三徑資蘭
亭傳墨訣草閣伴玄思惘悵湯田別深盃欲暝時

寄張愈光

名含

劉安悲落木曹植感飛蓬夜雨燈前夢秋霜鏡裏容
緜思遠道戚戚苦無踪何日來仙駕青天騎白龍

贈王民望

有序

王名廷表

五首

鈍菴王民望自臨安千里來訪予信宿而別

期與池南唐子午衢段子會於晉寧為盤龍
海寶之遊值予阻疾不果行作此以寄且訂

後期

與子曠參辰眷言淹晷曜婉婉來清揚媿媿啓玄調
宿太華峯晨理高峽釣沙上愴分襟城隅阻言笑

言笑豁相思有約當後期雲嶠苔屐並風檐蘭襟披
步拾瑤艸池酌繫青絲俊遊希白下高會繼南皮

南皮駛清流北渚爽金韞去驂儼立鵠走舸歛飛鷗胡

然嬰痲疾臨岐隔歡遊望美天咫尺何以慰離憂

離憂一何叢我心一何忡紫芳行采采翠管坐濛濛開
奩鬢寶餌隱几拂彫桐馳神隨去鷁絨情付歸鴻

歸鴻翔次寥緒風傳颺杳涼氛秀峯期溫盟通海榻詎
詫彩霞分終令碧雲合張敏夢不迷劉勰興還答

高峽夕

雌霓音入聲晴橋跨雄風晚籟斜綠疇翻穉稷蒼浦贄兼

葭左思賦兼葭贄葑葑森注贄音犬分別也樵隱同山麓漁商集水涯荒村

門早閉遠樹已歸鴉

贈別陸後野 名坤

邂逅叶心期燈花對酒卮浮雲遷客夢明月美人詩館
曙鳴雞早關寒度馬遲行過宜祿驛好寄世南碑 陸為予言

虞世南宜祿碑在邠州字畫
遒勁不減廟堂碑人罕摹印

送人之吳楚

佳麗東南地登臨卷畫中竹雲籠曉渚梅雨澹烟空風
順帆如馬天高月似弓哀歌休拔劍槎上覓仙翁

舟曉

羈心厭漏遲未曉命舟師樹過如人立帆開覺岸移天
梭星落織霞錦日舒絲漸喜漁村近炊烟出竹籬

與胡在軒簡西魯泛舟至柳壩晚歸

北風吹海岸擁沫聚銀沙去掉穿汀葉歸帆拂渚花鷺
兒黃似酒楊柳綠藏鴉物色撩人醉醉歌凌紫霞

真曉

林迥碧雞飛花稍露欲晞迢迢城漏寂隱隱寺鐘微小

店明燈出殘粧帶月歸雲津漁唱起空翠溼蓑衣

元宵雪

娥月隱春城仙雲飄六霏花隨四照出光與九枝爭白
戰橫詩槩清愁倩酒兵何須訪姑射人世即瑤京

九月望日與諸弟夜泛

嘉木繞通川空林衆籟傳江天清近榻霜月冷侵船盡
日供愁坐連宵只醉眠不同池上酌何事有新篇

次夜

南浦風光濶東林霽景饒灘聲喧昨夜峯影靜今朝行
牒尋烟語停杯待月邀清遊不隔日玉樹好風標

登金華山玉京觀中有陳子昂書臺

二首

巴嶠亭前立涪江檻外斜雪堂開洞府雲木上烟霞葉
響非關雨林香不是花玉京如可到從此問丹砂

古調今寥落令人憶拾遺不圖垂拱世復覩建安詩瑟
在猶清廟碑殘尚色絲紫瑤留詠後千載有鍾期

昭化飲啜酒

醞入烟霞品功隨麩藥高秋筐收橡栗春瓮發蒲桃旅
集三更興賓酬百拜勞苦無多酌我一吸已陶陶

早發神宣驛

孟冬來棧閣清曉度鄉關隱月雞鳴急回風虎嘯聞霧
收才見樹日出始分山時復憑高望秦川指掌間

長安遇雪

日下長安近天涯晏歲逢凍雲千畝竹寒雪五陵松橋
遠迷玄壩山明見紫峯行行遊獵者爭信客無悰

沙河縣

空磧少人烟孤城大道邊
平沙盤馬路殘雪射鵬天
野日三竿上河水百片穿
條風將變柳客思感流年

春雪寄內

春陰鬱未開春雪犯寒來
點綴過花徑飄揚度玉臺
望迷河畔草歌落隴頭梅
併起因風興還思道韞才

十二月朔旦南郊扈從省牲

天仗雲門外宵衣曉漏前
蒼龍旂影動朱鷺鼓聲傳
星

爛甘泉燭霜清泰時烟南郊新警蹕重親孝皇年

方云
得初

唐
體

送內弟黃秀卿

畢

還遂寧

素舸濤江來白馬嶠關去荻岸屢浴洄蕪臯幾容與寒
日照行觴朔吹飄離緒超遠望平原恂脰空延佇

癸未除夕

金壺躍溫耐華燭蟠暖烟壁陰逝可惜瓊籌俄已遷噦
噦齋聲動蒼蒼龍角旋椒觴猶頌酒蘭佩催朝天

夜泊

夜泊中崑下扁舟對萬峯一星高岸火幾杆上方鐘水
落灘聲急雲低雨意濃何人吹鐵笛潭下惱魚龍

送鄧士曾給事以言事謫金壇

名繼曾

千里泛滄波孤蹤寄薜蘿風塵隨燕雀水國傍鼃鼉湘
浦捐春珮承明待晚珂華陽雖咫尺未許聽仙歌

秋日枕疾

四首

陋巷本寂寞病來人更稀氣候倏忽變陰晴頃刻非量

移寒燠榻調停單袂衣餘生付泡影焉知衡氣機

風前黃葉樹雨後紫苔牆肺病知秋早身閒覺日長杵
聲頻擣藥烟縷漸消香遮眼聊書卷雕蟲久已忘

病叟茅亭臥頑童竹杖隨半人嘲鑿齒一足笑虞夔夢
境虛傳蝶支床底用龜古方渾不效無乃偽軒岐

殘燈光翳壁斜月影穿帷衰鬢難禁日幽憂不寐時棘
籬嗥夜犬茅棟笑寒鴟展轉那堪說呻吟強作詩

春月臥病至夏首

愁心冷不春病眼夜難晨蝴蝶成虛夢芭蕉喻幻身枕
乾垂老淚門絕問奇人惟藥添無量呻吟似飲醇

新秋悼亡 二首

清商不堪聽白露自生愁孤枕寒先入空階雨未休夢
魂回永夜悲怨集新秋奇樹中庭色傷心不再遊

又

黃葉擁堦深秋聲雜暮砧天空孤鶴唳露冷百蟲吟錦
暗宵衾色瓊沉曉珮音可憐搖落節感此倍蕭森

欠巨口巨人巨

升菴集

三

升菴集卷十九